

**Teks Ucapan Sempena Program Townhall dan Pelancaran Buku
Keluarga Malaysia Keluarga Sejahtera**

By : YAB DATO' SRI ISMAIL SABRI YAAKOB

Date : 22/04/2022

**TEKS UCAPAN
YAB DATO' SRI ISMAIL SABRI BIN YAAKOB
PERDANA MENTERI**

SEMPENA

**PROGRAM TOWNHALL DAN MAJLIS PELANCARAN BUKU
KELUARGA MALAYSIA KELUARGA SEJAHTERA**

**22 APRIL 2022 | 10 PAGI
PUSAT KONVENSyen ANTRABANGSA, PUTRAJAYA**

**Assalamualaikum Warahmatullahi Wabarakatuh, Salam
Sejahtera dan Salam Keluarga Malaysia.**

1. Alhamdulillah, puji-pujian ke hadrat Allah SWT dengan limpah kurnia-Nya kita dapat hadir pada majlis bermakna ini dalam bulan yang penuh keberkatan.

2. Saya ingin merakamkan setinggi-tinggi penghargaan kepada Menteri di Jabatan Perdana Menteri (Hal Ehwal Agama) dan seluruh agensi di bawahnya yang sentiasa menyokong usaha kerajaan untuk mengukuhkan Keluarga Malaysia.

Keluarga Malaysia yang dikasihi

3. Ketika saya memperkenalkan tema Keluarga Malaysia pada 22 Ogos 2021, Yang Berhormat Datuk Haji Idris bin Haji Ahmad dengan segera menyahutnya dan membantu melengkapkannya daripada aspek kesejahteraan.

4. Saya yakin bahawa aspek ini amat penting untuk diterjemahkan dalam tadbir urus negara demi memastikan perpaduan yang utuh antara pelbagai kaum dan agama selain mewujudkan masyarakat yang penyayang.

5. Aspirasi Keluarga Malaysia bermatlamat untuk memastikan ahli keluarga besar kita yang terdiri daripada pelbagai bangsa dan agama, hidup dalam suasana yang mesra dan harmoni sambil berkongsi 3 nilai utama iaitu 'Keterangkuman', 'Kebersamaan' dan 'Kesyukuran'.

6. Amalan hidup bersama ini telah pun berterusan sejak enam dekad lalu dan perlu dikekalkan malah diperkukuhkan walau apa jua cabaran yang mendatang.

7. Sebagai Kerajaan, sudah menjadi tanggungjawabnya untuk sentiasa menyuburkan semangat perpaduan, menyuntik nafas segar dalam kesatuan, mencari titik persamaan dalam kepelbagaian.

Keluarga Malaysia yang dikasihi,

8. Alhamdulillah, kita telah menunjukkan kejayaan yang membanggakan dalam tempoh Aspirasi 100 Hari Keluarga Malaysia. Namun, Kerajaan masih belum berpuas hati dan telah bertekad untuk mendepani dua cabaran utama iaitu memerangi pandemik COVID-19 dan memulihkan ekonomi negara.

9. Bagi cabaran pertama, kita telah melaksanakan tanggungjawab, mengukuhkan tadbir urus yang menampakkan hasil apabila negara berjaya memasuki Fasa Peralihan ke Endemik pada 1 April.

10. Bagi cabaran kedua, Kerajaan telah melaksanakan pelbagai langkah melalui penstrukturan semula ekonomi dan penyediaan bantuan kewangan

dan infrastruktur. Ini adalah usaha kerjasama semua pihak baik di peringkat persekutuan dan peringkat negeri.

11. Pada masa sama, pengupayaan Keluarga Malaysia perlu mengimbangi kepentingan spiritual dan rohani dengan pembangunan fizikal dan pengukuhan ekonomi.

12. Sekiranya tumpuan hanya diberikan kepada pembangunan fizikal tanpa menekankan aspek spiritual, apa yang dibimbangi akan wujud kepincangan dalam usaha memperkukuhkan perpaduan negara.

13. Sebagai pembuat dasar, Kerajaan perlu memainkan peranan bersungguh-sungguh dalam menyusun atur segala langkah bagi menterjemahkan konsep kesejahteraan agar ia dapat meresap ke dalam jiwa seluruh Keluarga Malaysia.

Keluarga Malaysia yang saya kasihi,

14. Agama merupakan benteng pertahanan jiwa yang menjadi petunjuk dalam memelihara hubungan antara kaum. Oleh itu saya berpandangan perbezaan agama bukanlah suatu halangan untuk bersatu-padu.

15. Malah, Islam sendiri mengangkat nilai kebersamaan dalam kepelbagaian rumpun, bangsa dan budaya. Untuk menikmati kesejahteraan dalam sesebuah negara, satu mekanisme ampuh perlu dijadikan landasan.

16. Saya mendapati memelihara kemaslahatan merupakan manifestasi kesejahteraan. Ini kerana kemaslahatan itu sendiri merupakan inti pati dalam objektif pensyariaan Islam yang sentiasa disebutkan sebagai pendekatan Maqasid Syariah.

17. Dalam satu persidangan anjuran Jabatan Kehakiman Syariah Malaysia pada September lalu, saya telah menyatakan bahawa Maqasid Syariah perlu dijadikan teras setiap dasar dalam membentuk sesebuah negara adil, sejahtera dan harmoni.

18. Hari ini pula, kita diperjelaskan tentang pendekatan Maqasid Syariah dalam tadbir urus Keluarga Malaysia. Dengan mengambil kira Islam sebagai agama Persekutuan, saya berharap setiap Kementerian dan agensi dapat menzahirkan prinsip pemeliharaan masalah dalam setiap dasar yang digubal.

19. Prinsip ini menekankan perkara-perkara universal, sesuai untuk seluruh ahli Keluarga Malaysia yang mendambakan kesejahteraan dan

keharmonian antara kaum dan penganut pelbagai agama. Ia tidak mengehadkan amalan dan kepercayaan agama lain, tetapi ia menuntut nilai kebersamaan dalam memelihara hubungan sesama kita.

Keluarga Malaysia yang saya kasihi,

20. Saya mengucapkan setinggi-tinggi tahniah dan terima kasih kepada Menteri di Jabatan Perdana Menteri (Hal Ehwal Agama) melalui Jabatan Kemajuan Islam Malaysia (JAKIM) dan Institut Kefahaman Islam Malaysia (IKIM) kerana menghasilkan Buku Keluarga Malaysia, Keluarga Sejahtera.

21. Buku ini menekankan aspek tadbir urus yang holistik dan mampan berasaskan syariat Islam dalam memelihara hubungan Keluarga Malaysia.

22. Ia juga memandu pembuat dasar untuk memperkukuh kesejahteraan Keluarga Malaysia melalui penyampaian perkhidmatan yang diberikan.

23. Justeru, wajar sekali JAKIM dijadikan pusat rujukan oleh semua Kementerian dan Agensi untuk melaksanakan tadbir urus berasaskan Maqasid Syariah.

24. Namun begitu, apa yang diharapkan ialah pendekatan Maqasid Syariah diterjemahkan dalam bentuk pelaksanaan dan dijadikan panduan atau kerangka dalam membangunkan dasar-dasar baharu sambil memperkasa yang sedia ada.

25. Sekiranya dasar-dasar tersebut dilaksanakan dengan sebaiknya, dan kefahaman yang jelas diberikan kepada penjawat awam pada semua peringkat, saya optimis, kesejahteraan yang diimpikan mampu dijiwai oleh seluruh anggota ahli Keluarga Malaysia.

26. Saya juga menggalakkan pelaksanaannya di peringkat negeri oleh Majlis Agama Islam Negeri-negeri (MAIN) dan Jabatan Agama Islam Negeri-negeri (JAIN).

27. Dengan lafaz bismillahirrahmanirrahim, saya dengan ini merasmikan Program Townhall dan Majlis Pelancaran Buku Keluarga Malaysia Keluarga Sejahtera.

Sekian,

Wabillahi Taufik Wal Hidayah

Wassalamualaikum Warahmatullahi Wabarakatuh.

Copyright of the Prime Minister's Office Official Website

Source: <https://www.pmo.gov.my/2022/04/teks-ucapan-sempena-program-townhall-dan-pelancaran-buku-keluarga-malaysia-keluarga-sejahtera/>